

**Súmariu Kazu
Tribunál Distritál Dili
Fevereiru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 23

Artigu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika-LKVD	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	8
Artigu 177 KP	Abuzu seksuál ba menór	1
Artigu 154 KP & artigu 2, 3, no 35 letra (a) LKVD ho Artigu 20 (1), artigu 2 (2 alinea f) Lei Arma Brankas	Ofensa ba integridade física simples ho natureza violénsia doméstika no arma brankas	1
Artigu 145 KP	Ofensa ba integridade física simples	2
Artigu 260 KP	Danu ho violénsia	1
Artigu 145 KP & artigu 258 KP	Ofensa ba integridade física simples no danu Simples	1
Artigu 252 KP	Furtu agravadu	2

Artigu 172 KP no artigu 23 KP	Tentativa violasaun seksuál	1
Artigu 258 KP	Danu simples	2
Artigu 322 KP	Explorasaun ba jogu ilísitu	1
Artigu 267 KP	Burla agravada	1
Artigu 138 KP no artigu 23 KP	Tentativa omisídiu simples	1
Artigu 257 KP	Abuza konfiansa agravadu	1
Totál		23

2. Totál desizaun ne'ebé JSMP monitoriza: 16

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	2
Pena prizaun		-
Pena multa	Artigu 67 KP	6
Absolve		6
Pena admoestasaun	Artigu 82 KP	2
Totál		16

3. Totál kazu ne'ebé sei kontinua Prosesu tuir JSMP nia monitorizasaun: 7

B. Diskrisaun sumariu julgamentu ba desizaun kazu sira

1. Krime ofensa ba integridade fizika simples

Nú. Prosesu: : 0333/19.DICMR
 Kompozisaun Tribunál : Singulár
 Juis : Dra. Ana Paula Fonseca
 Prokuradór : Dr. Antonio Tavares
 Defeza : Dr. Genini Daos (pessoa idónia)
 Desizaun : Absolve

Iha 02 Fevereiru 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ne'ebé envolve arguidu CdC hasoru Lezadu SP, iha Suku Manleuana, Munisípiu Dili.

Akuzasaun prokuradór

Prokuradór akuza katak iha 10 Juñu 2019, iha oras tuku 17:30 lokraik, iha Manleuana, arguidu ba iha lezadu nia uma no husu tuir ba lezadu nune'e "*Ilda Maria iha ne'ebé*" no lezadu hatan katak mana Ilda sai ho nia katusas oan ba hola modo, hakarak hasoru hein iha ne'e, derepente deit arguidu kaer lezadu nia fuuk hodi basa dala ida iha lezadu nia hasan parte loos, lezadu halai arguidu foti fatuk tuda tuir lezadu, maibé kona fali iha moru no fatuk nia rahun mak kona lezadu nia liman parte karuk resulta kanek, hafoin lezadu nia feton nain rua no viziñu sira lori kedes lezadu ba halo tratamentu iha Sentru Saude Komoro.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal too tinan 3 ka multa.

Produsaun ba prova sira

Iha julgamentu, arguidu deklara katak iha faktu balun loos no balun laloos, faktu ne'ebé loos mak arguidu ba duni Manleuana hodi buka tuir mana Ilda ne'ebé hanesan arguidu nia eis feen nia alin, ne'ebé hanesan parte terseira halo arguidu fahe malu ho nia eis feen no arguidu atu ba husu tuir, tanba as mak nia gosta mete ema nia uma laran. Entretantu faktu kona-ba arguidu halo agresaun fízika hasoru lezadu ne'e laloos, tanba arguidu laiha problema ho lezadu. Iha parte seluk lezadu kontinua konfirma faktu hotu iha akuzasaun.

Testemuña MB nu'udar lezadu nia bin depoimenta katak arguidu ba iha Manleu hamrik iha uma oin hakilar maka'as no husu tuir mana Ilda, no sasin hatan katak mana Ilda ba sosa hela modo, derepente arguidu rasta lezadu nia fuuk basa iha lezadu nia hasan parte karuk no dudu monu ba rai halo lezadu nia liman kanek.

Testemuña AE nu'udar lezadu nia bin depoimenta katak iha akontesementu ne'e sira tuur hela iha uma oin, derepente arguidu to'o husu tuir mana Ilda Maria, depois de lezadu hatan dehan mana Ilda sai ba hola hela modo ho nia laen, arguidu tuku kedes iha lezadu nia hasan parte loos.

Alegasaun finál

Prokuradór konsidera arguidu provadu komete krime hasoru lezadu, mezmu arguidu koko atu nega faktu balun, maibé lezadu no testemuña sira konfirma faktu iha

akuzasaun, nune'e husu ba tribunál atu kondena arguidu hodi fó indemnizasaun ba lezadu.

Entretanntu defeza haktuir katak arguidu ba duni iha Manleuana maibé la halo agresaun fízika hasoru lezadu no defeza nota katak iha diferensia deklarasaun entre lezadu ho testemuña sira, tanba ne'e defeza husu atu absolve arguidu husi prosesu ne'e.

Desizaun

Depoisde avalia faktu hotu, tribunál duvida ho prova sira, tanba iha deklarasaun ne'ebé kontrariu entre lezadu no testemuña sira, ho nune'e tribunál konklui prosesu ne'e no absolve arguidu.

2. Krime maus -tratus ba kónjuje ho natureza violénsia doméstika

Nú. Prosesu	: 0023/18.ERSIC
Kompozisaun Tribunál	: Koletivu
Juis	: Dra. Maria Solana, Dra. Ana Paula Fonseca, Dr. Ivan Suritay Gonçalves
Prokuradór	: Dr. Simião Brites
Defeza	: Dra. Agustinha Oliveira
Desizaun	: Pena prizaun tinan 2 suspende ba tinan 2 fulan 6

Iha 03 Fevereiru 2022, Tribunál Distritál Dili prezide julgamentu leitura akordaun ba krime maus tratus ba kónjuje ho natureza violénsia doméstika ne'ebé envolve arguidu RMG hasoru nia feen, iha Munisípiu Dili.

Akuzasaun prokuradór

Prokuradór akuza katak iha 23 Janeiru 2018, iha oras tuku 01:00 madrugada, arguidu foti besi kanu kuadradu ida hodi baku dala ida iha lezada nia liman parte karuk no lori liman tuku dala rua iha lezada nia kotuk laran. Arguidu kontinua tebe lezada nia kelen rezulta lezada monu ba rai, bainhira lezada monu hela iha rai arguidu kontinua sama lezada nia kotuk laran no rasta lezada b amai iha kuartu laran. Antes agresaun ne'e, argidu ho lezada diskute malu kona-ba arguidu halo lakon tiha ema nia motorizada nune'e lezada dehan ba arguidu atu buka osan hodi selu ema nia motorizada refere. Ho nune'e mosu agresaun hirak ne'e.

Desde moris hamutuk hanesan feen ho laen, sempre mosu hela deit problema entre arguidu no lezada, bainhira arguidu simu ema nia sasan rumu sein koñesimentu lezada nu'udar nia feen no kuandu lezada husu tuir arguidu sempre ho maneira baku deit hodi halo tauk lezada labele ko'alía. Depoisde akontesimentu iha dia 23 de Janeiru 2018, arguidu ho lezada moris separa, arguidu ba hela tiha ho ninia família durante tinan rua

nia laran, nunka buka hatene kona-ba lezada ho sira nia oan nain rua no husik hela lezada mak asumi responsabilidade hodi sustenta sira nia oan nain rua. Iha 8 Agostu 2020, arguidu foin ba buka tuir lezada ho nia oan nain rua.

Prokuradór akuza arguidu kontra artigu 154 KP kona-ba krime maus-tratus ba kónjuje ho moldura penal tinan 2 too tinan 6 prizaun no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu deklara katak iha faktu balun loos no faktu balun laloos, faktu ne'ebé laloos mak arguidu laos lori besi kuadradu mak baku lezada, maibé arguidu lori ai-sar nia kain maka baku lezada, enkuantu faktu seluk ne'e loos hotu. Arguidu deklara liután katak depoisde problema ne'e liu tiha fulan hitu, arguidu ba buka tuir nia feen ho nia oan nain rua iha lezada nia família hodi fó osan US\$150.00 no bibi ida ba lezada nia inan aman no husu mós diskulpa. Arguidu mós deklara katak arrepende nia hahalok no promete sei la komete tan krime hanesan hasoru lezada iha futuru.

Alende ne'e lezada kontinua konfirma faktu hotu iha akuzasaun no deklara katak arguidu laos lori besi kanu maibé lori ai-sar nia kain mak baku lezada no depoisde akontesementu ne'e liu tiha tinan rua mak arguidu foin ba buka lezada ho sira nia oan nain rua no arguidu lori duni osan US\$150.00 no bibi ida hodi husu diskulpa ba lezada no lezada nia inan aman.

Alegasaun finál

Prokurador konsidera arguidu provadu komete krime hasoru lezada, mezmu arguidu koko atu nega faktu balun, maibé lezada konfirma faktu hotu iha akuzasaun, nune'e atu prevene krime hanesan ne'e akontese tan iha futuru no hatoman arguidu uza violénsia hodi rezolve probleme husu ba tribunál atu kondena arguidu tuir konviksaun tribunál nian.

Entretantu defeza haktuir katak arguidu deklara deit faktu ne'ebé nia komete, arrepende ona nia hahalok no promete sei la komete tan krime hanesan hasoru lezada iha futuru, tanba ne'e husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu hotu, tribunál prova katak arguidu lori ai-sar nia kain baku dala ida iha lezada nia liman parte karuk no lori liman tuku dala rua iha lezada nia kotuk laran. Arguidu kontinua tebe lezada nia kelen rezulta lezada monu ba rai, bainhira lezada monu hela iha rai arguidu kontinua sama lezada nia kotuk laran no rasta lezada ba mai iha kuartu laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende ona nia hahalok no promete sei la komete tan krime hanesan hasoru lezada iha futuru. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua fulan neen.

3. Krime ofensa ba integridade fizika simples ho natureza violénsia doméstika

Nú. Prosesu	: 0061/21.LILIQ
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Hernanio Rangel
Defeza	: Dr. Rui Manuel Guterres
Desizaun	: Pena multa US\$30.00

Iha 04 Fevereiru 2022, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu ME hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 22 Agostu 2021, iha oras tuku 13:00 meiudia, arguidu tuku dala ida iha lezada nia reen-toos, tuku dala ida iha lezada nia matan laran parte loos, rezulta lezada sofre moras. Antes agresaun ne'e, arguidu ho lezada diskute malu kona-ba lezada deskonfia arguidu amante (*selingkuh*) ho feto seluk, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu hili direitu nonook. Entretantu lezada kontinua konfirma faktu hotu iha akuzasaun.

Alegasaun finál

Prokuradór haktuir katak mezmu arguidu hili direitu nonook, maibé lezada konfirma faktu hotu iha akuzasaun, ho nune'e prokuradór konsidera arguidu provadu komete krime hasoru lezada, atu prevene krime ne'e akontese tan iha futuru husu ba tribunál atu kondena arguidu ho pena prizaun prizaun tinan ida suspende ba tinan ida.

Entretantu defeza haktuir katak iha produsaun ba prova arguidu hili direitu nonook, maibé lezada konfirma faktu hotu iha akuzasaun, ho nune'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu tuku dala ida iha lezada nia reen-toos, tuku dala ida iha lezada nia matan laran parte loos, rezulta lezada sofre moras.

Bazeia ba faktu provadu hirak ne'e, tribunál konklui prosesu ne'e no kondena arguidu ho pena multa US\$30.00, ne'ebé kada loron arguidu sei selu 0,50 sentavus, durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

4. Krime esplorasaun ba jogu ilísitu

Nú. Prosesu	: 0068/22 DICMR
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Aderito António Pinto Tilman
Defeza	: Dr. Nelson Sandanha
Desizaun	: Pena multa US\$30.00

Iha 08 Fevereiru 2022, Tribunál Distritál Díli prezide julgamentu leitura sentensa ba krime jogu ilísitu ne'ebé envolve husi arguidu Marito dos Santos no Tiago de Deus hasoru Estadu RDTL, iha Tasi-Tolu, Munisípiu Dili.

Akuzasaun prokuradór

Prokuradór akuza katak iha 31 Janeiru 2022, iha oras tuku 14:00, lokraik, iha Aldeia Terra Santa, Suku Madohi, ekipa PNTL halo hela patrollamentu iha área refere. Bainhira PNTL sira to'o iha ne'ebá no verifika arguidu sira hamutuk no dirije hela esplorasaun jogu “*kuru-uru*” nune'e ekipa patrollamentu halo kedes kapturasaun ba suspeitu na'in rua ho objetu hanesan meza ida ho número kuru-kuru musan 3 no osan US\$21.00.

Arguidu sira halo atividade “*kuru-kuru*” laiha autorizasaun legal husi autoridade kompetente hanesan inspeksaun jeral husi jogu konforme DL no. 06/2016 de 20 Abril

kona-ba Rejime jurídiku de Lisenziamentu no kontrolu ba atividade jogu sira hanesan bola-guling, kuru-kuru, maibé arguidu sira la halo lisenziamentu no halo jogu refere hodi manan lukru ilíitu.

Prokuradór akuza arguidu nain rua kontra artigu 322 KP kona-ba explorasaun ba jogu ilíitu ho moldura penal too tinan 3 ka multa.

Produsaun ba prova sira

Iha julgamentu, arguidu Marito dos Santos no Tiago de Deus deklara integralmente ba faktus ne'ebé imputa ba sira no arguidu sira deklara katak sira na'in rua ba ajuda de'it, kuru-kuru na'in mak señor Miguel no wainhira haree ekipa patrollamentu to'o kuru-kuru na'in halai tiha.

Arguidu sira primeiravés mai hatan iha tribunál, arrepende ho aktu ne'ebé sira komete no bainhira atu komesa fali jogu refere sira sei haruka jogu na'in ba rejistru iha autoridade kompetente.

Alegasaun finál

Prokuradór haktuir katak arguidu sira konfesa integralmente ba faktus hotu iha akuzasaun, nune'e husu ba tribunál atu aplika pena multa ba arguidu sira.

Enkuantu defeza haktuir katak arguidu sira konfesa totálmente ba faktu sira iha akuzasaun no arguidu na'in 2 mós laos na'in ba jogu refere tanba ne'e arguidu na'in rua mós laiha kompeténsia atu halo rejistrasaun ba jogu ne'e no iha momentu ne'e, bainhira ekipa patrollamentu to'o jogu na'in halai tiha nune'e polísia kaptura mak arguidu na'in rua. Tanba ne'e husu ba tribunál atu aplika pena multa ba arguidu na'in rua.

Desizaun

Depoisde avalia faktu sira hotu, tribunál prova katak iha Aldeia Terra Santa, Suku Madohi, ekipa PNTL halo hela patrollamentu iha área refere. Bainhira PNTL sira to'o iha ne'ebá no verifika arguidu sira hamutuk no dirije hela esplorasaun jogu "kuru-uru" nune'e ekipa patrollamentu halo kedes kapturasaun ba suspeitu na'in rua ho objetu hanesan meza ida ho número kuru-kuru musan 3 no osan US\$21.00.

Bazeia ba faktu provadu hirak ne'e no tetu mós ho sirkunstânsia atenuante sira hanesan arguidu konfesa, arrepende ona sira nia hahkok, nune'e tribunál konklui prosesu ne'e no kondena arguidu nain rua ho pena multa US\$30.00, ne'ebé arguidu sira selu 0,50 sentavus kada loron, durante loron 60. Tribunál mós fiksa pena alternativa durante loron 40 prizaun, bainhira arguidu sira la kumpri pena multa refere.

5. Krime ofensa ba integridade física simples ho natureza violénsia doméstika

Nú. Prosesu : 0209/21.DICMR
Kompozisaun Tribunál : Singulár
Juís : Dr. Argentino Nunes
Prokuradór : Dr. Hernany Rangel
Defeza : Dr. Jose da Silva
Defeza : Pena admoestasaun

Iha 8 Fevereiru 2022, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve envolve arguidu PM hasoru nia feen, iha Munisípiu Dili.

Akuzasaun prokuradór

Prokuradór akuza katak iha 3 Abril 2021, iha oras tuku 7:00 dadeer, arguidu basa dala ida iha lezada nia hasan parte loos, basa dala ida iha lezada nia hasan parte karuk, tuku dala ida iha lezada nia kanuruk, rasta lezada nia fuuk ba parede, rezulta lezada sofre moras. Antes agresaun ne'e, arguidu ho lezada diskute malu kona-ba lezada halimar kartu ho sira nia oan, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ona nia hahalok, diak malu ona ho lezada no promete sei la komete tan krime hanesan

iha futuru. Arguidu mós deklara katak depoisde akontesimentu lezada ba hela tiha iha Uma Mahon durante fulan ida ho nia oan na'in rua no arguidu iha vontade hodi ba vizita lezada iha Uma Mahon maibé regra husi Uma Mahon mak la autoriza ema atu halo vizita bá lezada sira. Depoisde liu- tiha fulan ida lezada sai tiha husi Uma Mahon família rua tuur hamutuk hodi rezolve problema ne'e tuir kultura Timor nian, arguidu husu desculpa liu-husi fó sala osan US\$80.00 ho tua botir rua no lezada fó tais ida no tua botir rua.

Alende ne'e, lezada konfirma faktu hotu iha akuzasaun no deklara katak depoisde sai husi Uma Mohon sira rezolve ona problema ne'e tuir kultura Timor nian no agora dadaun moris hamutuk nafatin iha uma ida.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada no kazu ne'e sira rezolve ona tuir kultura Timor nian, ho nune'e husu ba tribunál atu kondena arguidu ho pena admoestasaun, atu nune'e arguidu la komete tan krime hanesan iha futuru.

Entretantu defeza husu ba tribunál atu fó pena ne'ebé kmaan ba arguidu ho konsiderasaun sira katak, arguidu konfesa, arrepende nia hahalok, diak malu ona ho lezada no kazu ne'e rezolve ona tuir kultura Timor nian no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte loos, basa dala ida iha lezada nia hasan parte karuk, tuku dala ida iha lezada nia kanuruk, rasta lezada nia fuuk ba parede.

Bazeia ba faktu provadu hirak ne'e no tetu mós ho sirkunstânsia atenuante sira hanesan arguidu konfesa, arrepende nia hahalok, diak malu ona ho lezada no promete

sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena admoestasaun.

6. Krime ofensa ba integridade física simples ho natureza violénsia doméstika

Nú. Prosesu	: 0333/21.DICMR
Kompozisaun Tribunál	: Singulár
Juis	: Dr. Afonso Carmona
Prokuradó	: Dr. Hernanio Rangel
Defeza	: Dr. Rui Manuel Guterres
Desizaun	: Pena multa US\$45.00

Iha 11 Fevereiru 2022, Tribunal Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu DA hasoru nia feen, iha Munisípiu Dili.

Akuzasaun prokuradór

Prokuradór akuza katak iha 23 Juñu 2021, maizumenus iha oras tuku 20:00 kalan, arguidu lori kadera baku dala ida iha lezada nia ulun, rezulta kanek no suku pontu haat. Antes agresaun ne'e, arguidu ho lezada diskute malu kona-ba lezada husu osan ba arguidu atu trata lezada nia inan ne'ebé moras hela no baixa hela iha maternidade, ho nune'e mosu agresaun hirak ne'e. Depoisde akontesimentu ne'e lezada halai kedas ba polísia no polísialori lezada ba halo tratamentu iha Sentru Saude Bairo Formosa.

Produsaun ba prova sira

Iha prosesu julgamentu arguidu konfesa faktu hotu iha akuzasaun, arrepende ona nia hahalok, foin primeiravés mai hatan iha tribunál no promete sei la komete tan krime hanesan hasoru lezada iha futuru.

Alende ne'e lezada mós konfirma faktu hotu iha akuzasaun no deklara mós katak arguidu laos foin primeiravés halo agresaun física hasoru lezada, maibé desde hola malu arguidu halo bebeik agregasaun física hasoru lezada.

Alegasaun finál

Prokuradór haktuir katak tuir loos arguidu hanesan laen tenke hadomi no proteze nia feen, maibé pelu kontrariu arguidu mak komete fali krime ne'e hasoru lezada no bazeia ba deklarasaun lezada nian arguidu laos foin primeiravés komete krime hasoru lezada, maibé krime ne'e akontese bebeik ona, nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun sira katak, arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu lori kadera baku dala ida iha lezada nia ulun, rezulta kanek no suku pontu haat.

Bazeia ba faktu provadu hirak ne'e no tetu mós ho sirkunstânsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru. Ho nune'e tribunál konklui prosesu no kondena arguidu ho pena multa US\$45.00, ne'ebé arguidu sei selu 0,50 sentavus kada loron, durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

7. Krime ofensa ba integridade fízika simples ho danu simples

Nú. Prosesu	: 0211/21.PDDIL
Kompozisaun Tribunál	: Singulár
Juis	: Dra. Maria Solana
Prokuradór	: Dr. Jaçinto Babo
Defeza	: Dr. Humberto Alves
Desizaun	: Pena multa US\$75.00

Iha 11 Fevereiru 2022, Tribunal Distritál Dili prezide julgamentu leitura sentensa ba krime ofensa ba integridade fízika simples no danu simples ne'ebé envolve arguidu Basilio Martins Moniz Perreira ho Rafael de jesus hasoru lezadu Deonisio Henrique do Espírito Santo, iha Aldeia Golgota, Suku Komoro, Postu Administrativu Dom Aleixo, Munisípiu Dili.

Akuzasaun prokuradór

Prokuradór akuza katak iha 21 Marsu 2021, iha oras tuku 13:00 meiudia, iha Area Golgota, bainhira lezadu atu ba sosa modo ho motor liu iha arguidu sira nia bairu, arguidu Basilio hakilar dehan “hoe Deoniso,” maibé lezadu lao nafatin, depoisde sosa tiha modo bainhira atu fila fali ba uma iha dalan klaran arguidu Basilio hamrik iha dalan klaran tuda fatuk kona iha lezadu nia knosen parte karuk no arguidu Rafael tuda motor nia bodi to'o rahun, aktu hirak ne'e rezulta lezadu sente moras iha knosen no arguidu mós tenke hasai osan US\$100.00, hodi hadia fali motor ne'ebé hetan estragus.

Prokuradór akuza arguidu Basilio kontra artigu 145 KP kona-ba ofensa ba integridade fízika simples ho moldura penal too tinan 3 ka multa no arguidu Rafael prokuradór akuza ho artigu 258 KP kona-ba danu simples ho moldura penál to'o tinan 3 ka multa.

Produsaun ba prova sira

Iha julgamentu, arguidu Basilio deklara katak faktu iha akuzasaun ne'e laloos hotu, tanba iha akontesimentu ne'e arguidu iha hela uma no ajuda hela nia ama tein, depoisde tein han meiudia hotu toba kedes, nune'e bainhira simu karta notifikasiacaun halo arguidu hakfodak, alende ne'e arguidu Rafael mós deklara katak faktu hotu laloos, tanba iha akontesimentu ne'e arguidu iha uma hela.

Iha parte seluk lezadu Deonisio Henrique konfirma faktu hotu iha akuzasaun no deklara katak iha akontesementu ne'e, lezadu haree ho matan rasik arguidu nain rua mak tenta asalta no estraga nia motor tuir saida mak konsta ona iha akuzasaun.

Alegasaun finál

Prokuradór haktuir katak mezmu arguidu sira nega faktu hotu iha akuzasaun, maibé lezadu konfirma faktu hotu iha akuzasaun no iha mós fotografia kona-ba motor ne'ebé hetan estragus, nune'e prokuradór konsidare arguidu sira provadu komete duni krime hasoru lezadu no husu ba tribunál atu kondena arguidu sira tuir konviksaun tribunál nian.

Enkuantu defeza haktuir katak arguidu sira deklara katak iha akontesementu ne'e arguidu sira la hatene, tanba iha akontesementu ne'e arguidu sira lahatene no iha kazu ne'e laiha sasin, nune'e husu ba tribunál atu absolve arguidu sira husi prosesu ne'e.

Desizaun

Depoisde avalia faktu sira hotu, tribunál prova katak arguidu Basilio hamrik iha dalan klaran tuda fatuk kona iha lezadu nia knosen parte karuk no arguidu Rafael tuda motor nia bodi to'o rahun, aktu hirak ne'e rezulta lezadu sente moras iha knosen no arguidu mós tenke hasai osan US\$100.00, hodi hadia fali motor ne'ebé hetan estragus.

Bazeia ba faktu provadu hirak ne'e, tribunál konklui prosesu ne'e no kondena arguidu nain rua ho pena multa US\$75.00, ne'ebé arguidu sira selu kada loran US\$1.00, durante loran 75. Tribunál mós fiksa pena alternativa durante loran 50 prizaun, bainhira arguidu sira la kumpri pena multa refere.

8. Krime ofensa ba integridade física simples ho natureza violénsia doméstika

Nú. Prosesu	: 0325/21.DICMR
Kompozisaun Tribunál	: Singulár
Juis	: Dr. Argentino Nunes
Prokuradór	: Dr. Hernany Rangel (Bemvinda mak substitui)

Defeza : Dr. Sebastião Amado

Desizaun : Pena multa US\$90.00

Iha 11 Fevereiru 2022, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu Jd C hasoru nia feen, iha Munisípiu Dili.

Akuzasaun prokuradór

Prokuradór akuza katak iha 19 Juñu 2021, iha oras tuku 17:30 lokraik, arguidu tuku dala rua iha lezada nia tilun hun, tuku dala ida iha lezada nia hirus matan, resulta lezada sofre moras. Antes agresaun ne'e, arguidu ho lezada diskute malu kona-ba arguidu bandu lezada atu labele haree lezada nia inan ne'ebé moras, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende ona nia hahalok no promete sei la komete tan krime hanesan iha futuru, arguidu mós deklara katak separa ona ho lezada no labarik sira hela ho arguidu no arguidu mak tau matan ba sira ninia nesesidade.

Alende ne'e, lezada mós konfirma faktu hotu iha akuzasaun no deklara katak lakohi ona atu moris hamutuk ho arguidu, tanba arguidu sempres halo agresaun física hasoru lezada, bainhira iha problema no labarik sira hela ho arguidu.

Alegasaun finál

Prokuradór haktuir katak arguidu provadu komete krime hasoru lezada, bazeia ba konfisaun arguidu nian no konfirma mós husi lezada, no tuir lolos arguidu hanesan ajente PNTL nia knaar mak atu kumpri lei no ordem maibé, pelu kontrariu arguidu mak komete fali krime hasoru lezada, nune'e atu prevene arguidu ninia arguidu hatoman an rezolve problema sira ho violénsia husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa, arrepende nia hahalok, hakarak atu diak malu fali ho lezada, maibé lezada mak lakohi no mezmu sira separa ona maibé arguidu nafatin iha responsabilidade masimu ba sira ninia oan.

Desizaun

Depoisde avalia faktu hotu, tribunál prova katak arguidu tuku dala rua iha lezada nia tilun hun, tuku dala ida iha lezada nia hirus matan.

Bazeia ba faktu provadu hirak ne'e no tetu mós ho sirkunstânsia atenuante sira hanesan arguidu konfesa, arrepende nia hahalok no mezmu sira moris separa ona maibé arguidu nafatin iha responsabilidade masimu ba oan sira. Ho nune'e tribunál konklui prosesu ne'e no kondena arguidu ho pena multa US\$90.00 ne'ebé kada loron arguidu sei selu US\$1.00, durante loron 90. Tribunál mós fiksa pena alternative durante loron 60 prizaun, bainhira arguidu la kumpri pena multa refere.

9. Krime ofensa ba integridade física simples ho natureza violénsia doméstika.

Nú. Prosesu	: 0008/20.ERATB
Kompozisaun Tribunál	: Singulár
Juis	: Dra. Maria Solana
Prokuradór	: Dr. Simeão B. Seixas
Defeza	: Dr. Juvinal Freitas
Desizaun	: Pena multa US\$75.00

Iha 11 Fevereiro 2022, Tribunál Distritál Dili prezide julgamentu leitura sentensa ba krime ofensa ba integridade física ho natureza violénsia doméstika ne'ebé envolve husi arguidu AS hasoru nia feen, iha Munisípiu Dili.

Akuzasaun Prokuradór

Prokuradór akuza katak, iha 21 Juñu 2020, iha oras tuku 09:30 dadeer, arguidu foti fiu eletrisidade nian hodi baku dala ida iha lezada nia liman, baku dala ida iha lezada nia ulun, baku dala ida iha lezada nia ain no baku dala ida iha lezada nia knosen. Antes

agresaun ne'e, arguidu ho lezada diskute malu kona-ba sira nia karau tama ema nia to'os no han ema nia ai-horis sira iha to'os laran, ho nune'e mosu agresaun hirak ne'e no depoisdé akontesementu ne'e lezada ba apresenta kedas keixa iha polísia.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu, arguidu confesa faktu hotu iha akuzasaun, arguidu mós deklara katak arrepende ona nia hahalok no promete sei la komete tan krime hanesan hasoru lezada iha futuru, arguidu hatutan liután katak depoisdé akontesimentu ne'e liutiha fulan ida mak sira di'ak malu fali no agora dadaun hela hamutuk iha uma ida.

Alende ne'e, lezada mós konfirma faktu hotu iha akuzasaun no konfirma mós ho arguidu ninia deklarasaun katak depoisdé akontesementu ne'e liutiha fulan ida mak sira diak malu fali.

Alegasaun finál

Prokuradór konsidera faktu hotu provadu bazeia ba konfisaun arguidu nian no konfirma mós husi lezada, mezmu nune'e atu prevene krime ne'e akontese tan iha futuru, husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak, arguidu confesa, arrepende nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisdé avalia faktu hotu, tribunál prova katak arguidu foti fiu eletrisidade nian hodi baku dala ida iha lezada nia liman, baku dala ida iha lezada nia ulun, baku dala ida iha lezada nia ain no baku dala ida iha lezada nia knosen.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada no promete sei la komete tan krime hanesan iha futuru, ho nune'e tribunál konklui prosesu ne'e no kondena arguidu ho pena multa US\$75.00 ne'ebé arguidu sei selu 0,50 sentavus kada loron, durante loron 150. Tribunál mós fiksa pena alternative durante loron 60 prizaun, bainhira arguidu la kumpri pena multa refere.

10. Krime danu simples

Nú. Prosesu	: 0092/20 DINFT
Kompozisaun Tribunál	: Singulár
Juis	: Dra. Maria Solana
Prokuradór	: Dr. Osorio de Deua
Defeza	: Dr. João de Carvalho
Desizaun	: Absolve

Iha 14 Fevereiru 2022, Tribunál Distritál Dili prezide julamentu leitura sentensa ba krime danu simples ne'ebé envolve arguidu Eurico Coreia Pintu hasoru lezadu Fu Yung Jong, iha Akadiru-hun Bidau, Munísípiu Dili.

Akuzasaun prokuradór

Prokuradór akuza katak arguidu hanesan traballadór iha lezadu nia loja “Timor food” no durante ne'e arguid la fó atendimento di'ak ba cliente sira ne'ebé mai hola sasan, tanba ne'e mak cliente balun ba tolok fali lezadu nu'udár loja na'in.

Iha 29 Jullu 2020, lezadu chama atensaun ba arguidu katak *“ita-boot kuandu mai serbisu iha ne'e tenke halo tuir regra loja ne'e nian”*, maibé arguidu la simu no hatan ba lezadu dehan *“ha'u mai la'ós toba ka halimar de'it”*. Nune'e lezadu kontinua esplika ba arguidu katak Lei Traballadór nian hateten klaru ona katak patraun ka loja na'in kuandu haruka, ita-boot tenki kumpri la'ós kontra fali. Aguidu la simu liafuan hirak ne'e hodi hirus no tuku rahun tiha susu ben SGM kaixa ida. Iha momentu ne'e arguidu mós hakilar staff Joana Carolina katak *“sé mak hateten ba patraun”*. Lezadu konsidera katak

arguidu nia hahalok ne'e bele prejudika cliente sira lakohi ba sosa tan sasan iha lezadu nia loja.

Prokuradór akuza arguidu kontra artigu 258 KP kona-ba danu simples ho moldura penal too tinan 3 ka multa.

Produsaun ba prova sira

Iha julgamentu, tribunál labele rona deklarasaun arguidu nian, tanba arguidu edital. Enkuantu lezadu deklara katak iha 2020, arguidu serbisu iha lezadu nia loja "Timor food" maibé halo atendimento la di'ak ba cliente sira, tanba arguidu lakohi foti sasan todan sira, arguidu lakohi kumpri ordem sira, nune'e lezadu chama atensaun maibé arguidu la simu nune'e arguidu nervoju no ameasa lezadu hodi tuku rahun tiha susuben SGM kaixa bot 1 ho folin US\$60,00, nune'e lezadu ba kesar polísia hodi kaer arguidu no loron tuir mai lezadu hapara kedas arguidu husi serbisu.

Alegasaun finál

Prokuradór konsidera arguidu provadu komete krime ne'ebé konsta iha akuzasaun, mezmu arguidu edital, maibé lezadu konfirma faktu hotu, nune'e husu ba tribunál atu kondena arguidu tuir konviksaun tribunál nian.

Enkuantu defeza haktuir katak arguidu edital no lezadu mak presta ninia deklarasaun ho nune'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu sira hotu tribunál konklui prosesu ne'e absolve arguidu husi prosesu ne'e.

11. Krime tentativa violasaun seksuál

Nú. Prosesu : 0011/21 ERSIC

Kompozisaun Tribunál : Koletivu

Juis : Dra. Ana P. Fonseca, Dra. Maria Solana, Dr. José Gonçalves

Prokuradór : Dr. Simão Seixas
Defeza : Dr. Afonso Gomes
Desizaun : Absolve

Iha 18 Fevereiru 2022, Tribunál Distritál Díli prezide julgamentu leitura akordaun ba krime tentativa violasaun seksuál ne'ebé envolve arguidu PdRO hasoru lezada, iha Munisípiu Ermera.

Akuzasaun prokuradór

Prokuradór akuza katak iha 13 Janeiru 2021, oras tuku 09:00 dadeer, lezada kú hela modo iha uma oin, arguidu ba lezada nia uma husu katak "*imi iha rama ka lae?*" Lezada hatan katak laiha. Depois arguidu mós tama ba tuur iha uma laran, mezmu lezada la konvida liu-tiha minutu balun xefe aldeia liu husi uma oin lezada bolu ba tuur ho arguidu iha uma laran no lezada mós halo kafé hodi ofereše ba sira.

Bainhira xefi aldeia fila tiha lezada halo serbisu uma nian, sein motivu ne'ebé klaru arguidu hakoak lezada hodi buti dala-rua iha lezada nia orgaun sensitivu, lezada mós hakilar no arguidu halai sai tiha husi uma, depois loron tuir mai lezada ba hato'o kedas keixa iha polísia. Konsekuénsia husi arguidu nia asaun ne'e halo lezada senti moe, triste no trauma ho hahalok arguidu nian ne'ebé mak la respeita lezada, arguidu hanesan lezada nia tiun no arguidu hela dook husi lezada nia uma.

Prokuradór akuza arguidu kontra artigu 23, 24 no 172 KP kona-ba tentativa, tentativa nia punibilidade no violasaun seksuál ho moldura penal tinan 5 too tinan 15.

Produsaun ba prova sira

Iha julgamentu, arguidu deklara katak faktu ne'ebé imputa ba nia balun loos no balun laloos. Loos mak lezada hanesan arguidu nia subriña no arguidu husu duni rama, entretantu kona-ba buti lezada nia orgaun sensitivu ne'e laloos, tanba iha momentu ne'ebá arguidu kaer de'it lezada nia liman tanba lezada tolok arguidu dehan "*bua-fatuk*", lezada tolok bebeik arguidu ho liafuan "*bua-fatuk*". Iha loron akontesimentu ne'e arguidu mak ba uluk lezada nia uma, depois xefe aldeia ba tuir nune'e lezada halo kafé no ofereše ba arguidu no xefe aldeia, depoisde hemu kafé xefe aldeia fila kedas no

arguidu sei tuur tan minutu rua. La hatene tanba saida lezada foti arguidu nia kalsa no roupa laran ne'ebé habai hela iha sobriňu nia uma hodi tetak rahun tiha.

Iha parte seluk, lezada konfirma faktu hotu iha akuzasaun no konfirma mós ho arguidu nia deklarasaun katak lezada koalia duni '*bua fatuk*,' maibé laos tolok lezada, arguidu atu mama mak lezada dehan ba arguidu katak malus laiha iha deit mak "*bua fatuk*".

Alegasaun finál

Prokuradór konsidera arguidu provadu komete krime hasoru lezada, mezmu arguidu koko atu nega faktu balun, maibé lezada konfirma, nune'e husu ba tribunál atu kondena arguidu tuir artigu 172 KP.

Entretantu defeza haktuir katak arguidu deklara de'it faktu ne'ebé nia komete no iha akontesimentu ne'e laiha testemuña, tanba ne'e defeza duvida ho lezada nia deklarasaun, nune'e husu ba tribunál atu absolve arguidu husi prosesu ne'e.

Desizaun

Depoisde avalia faktu hotu, tribunál konsidera katak arguidu la provadu komete faktu ne'ebé iha akuzasaun. Ho nune'e tribunál konklui prosesu ne'e no absolve arguidu husi prosesu ne'e.

12. Krime ofensa ba integridade fízika simples ho natureza violénsia doméstika

Nú. Prosesu	: 0099/20.LILIQ
Kompozisaun Tribunál	: Singulár
Juis	: Dra. Ana Paula Fonseca
Prokuradór	: Dr. Hernanio Rangel
Defeza	: Dra. Laura Valente Lay
Desizaun	: Pena admoestasaun

Iha 21 Fevereiru 2022, Tribunal Distritál Dili prezide julgamentu leitura sentensa ba krime ofensa ba integridade fízika simples ne'ebé envolve arguidu AdS hasoru nia oan mane, iha Munisípiu Likisa.

Akuzasaun prokuradór

Prokuradór akuza katak iha 19 Setembru 2020, iha oras tuku 09:00 dadeer, arguidu tuku dala ida iha lezadu nia kakorok no basa dala barak iha lezadu nia hasan parte

karuk no loos rezulta lezadu sente moras no bubu iha parte hasan. Antes agresaun ne'e, arguidu haree lezadu bok fali nia alin feto, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2(a), 3(c), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arguidu mós deklara katak arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru.

Prokuradór husu ba tribunál atu presinde lezadu nia deklarasaun, defeza mós konkorda ho prokuradór nia pedidu ne'e, bazeia ba pedidu husi prokuradór no defeza, tribunál presinde lezadu ninia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezadu, bazeia ba konfisaun arguidu nian, nune'e atu prevene krime hanesan akontese tan iha futuru, husu ba tribunál atu kondena arguidu tuir konviksaun tribunál nian.

Entretantu defeza husu ba tribunál atu kondena arguidu ho pena admoestasaun ho konsiderasaun katak, arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu tuku dala ida iha lezadu nia kakorok no basa dala barak iha lezadu nia hasan parte karuk no loos rezulta lezadu sente moras no bubu iha parte hasan.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu konfesa, arrepende ninia hahalok, foin primeiravés mai hatan iha tribunál no promete sei la komete tan krime hanesan iha futuru, ho nune'e tribunál konklui prosesu ne'e no kondena arguidu ho pena admoestasaun.

13. Krime furtu agravadu

Nú. Prosesu	: 0037/19.ERHAT
Kompozisaun Tribunál	: Koletivu
Juis	: Dra. Maria Solana, Jose Q. Soares no Dra. Ana paula Fonseca
Prokuradór	: Dr. Simeão Brites

Defeza : Dra. Agustinha Oliveira
Desizaun : Absolve

Iha 22 Fevereiru 2022, Tribunal Distritál Dili prezide julgamentu leitura akordaun ba krime furtu agravadu, ne'ebé envolve arguida Felisberta Martins, Zeferino da Silva, Julito de Araújo hasoru Lezadu Julio Alves, iha Munisípiu Ermera.

Akuzasaun prokuradór

Prokuradór akuza katak iha 06 Dezembru 2019, lezadu ho nia família, arguida/u sira ho sira nia família no lezadu nia feen kiik sira tuur hamutuk atu rezolve problema kona-ba lezadu nia feen bo'ot no feen kiik. Iha tuur hamutuk ne'e lezadu deklara katak nia nafatin hola arguida no Anabela sai hanesan lezadu nia feen kiik, maibé família husi feen bo'ot no arguida Felisberta la aseita atu lezadu iha feen rua. Ho nune'e sira diskute tanba parte rua la hetan konkordansia, tanba ne'e iha tuku 09:00 arguida Felisberta hamutuk ho nia maun sira hasai sasan husi uma laran hanesan ropa, karau ida, fahi sia, motor rua, armariu no parabola hodi lori hotu ba iha arguida nia inan-aman nia uma. Arguida/u sira práтика konduta sira ne'e ho forma livre, deliberada ho konsiénsia.

Prokuradór akuza arguida/u sira kontra artigu 252 nú 1 (alínea a) KP kona-ba furtu agravadu ho moldura penal tinan 2 too tinan 8.

Produsaun ba prova sira

Iha julgamentu, arguida Felisberta Martins konfirma faktu hotu iha akuzasaun no deklara katak sasan sira ne'ebé nia foti tanba hanesan feen bo'ot nia iha direitu tomak atu foti sasan sira ne'e, tanba sasan sira ne'e nia ho arguidu mak buka hamutuk mak hetan, arguida mós akresenta liután katak sasan sira ne'ebé nia foti hanesan Fahí, motor nia faan ona atu sustenta nesesidade sira nia oan nain tolu, depoisde lezadu deside hola feto kiik, hanesan inan faluk ida lezada assume responsabilidade hanesan mós aman iha uma laran.

Enkuantu arguidu Zeferino da Silva ho Julito de Araújo haktuir hanesan alin husi arguida Felisberta Martins, simu deit orientasaun husi arguida atu foti sasan sira ne'ebé konsta iha akuzasaun.

Iha parte seluk lezadu Julio Alves haktuir katak motivu husi problema ne'e tanba nia hola feto kiik, maibé arguida hanesan feen bo'ot hatene hela, no lezadu prontu responsabiliza ba osan fulan-fulan entre feen kiik ho feen bo'ot, maibé lahatene derepente deit bainhira atu rezolve kona-ba fahe osan fulan nian, arguida hamutuk ho arguidu nain rua seluk lalin sasan uma laran mós hotu kendas hanesan saida mak konsta iha akuzasaun, la simu ho hahalok ne'e lezadu deside hato'o keixa ba Polísia.

Testemuña MA nu'udar lezadu nia aman depoimenta katak, testemuña haree ho matan bainhira arguidu sira hasai sasan husi uma laran.

Alegasaun finál

Prokuradór haktuir katak iha produsaun ba prova arguidu sira konfesa faktus hotu, asaun sira ne'e akontese tanba motivu familiar, tanba ne'e prokuradór husu ba tribunál atu kondena arguida /u sira tuir konviksaun tribunál nian.

Enkuantu defeza haktuir katak arguida/u sira konfesa integralmente ba faktus hotu iha akuzasaun, tanba ne'e husu ba tribunál atu fó pena ne'ebé justu no adekuadu ba arguida/u sira.

Desizaun

Depoisde avalia faktu hotu, tribunál prova katak arguida/u ho nia maun sira hasai sasan husi uma laran hanesan ropa, karau ida, fahi sia, motor rua, armariu no parabola hodi lori hotu ba iha arguida nia inan-aman nia uma, maibé sasan sira ne'e sei iha hela, nune'e tribunál konklui prosesu ne'e no absolve arguida/u sira husi prosesu ne'e.

14. Krime pekulatu no abuza podér

Nú. Prosesu	: 0053/19.PGGCC
Kompozisaun Tribunál	: Koletivu
Juis	: Dr. Alvaro Maria Freitas, Dr. José Gonçalves no Dr. Argentino Nunes
Prokuradór	: Dr. Rogerio Viegas
Defeza	: Dr. Nelson Borges
Desizaun	: Absolve

Iha 23 Fevereiru 2022, Tribunál Distritál Dili prezide julgamentu leitura akordaun ba krime pekulatu no abuzu poder ne'ebé envolve arguidu Manecas da Conceição Soares no arguidu Januario Domingos Cabecas Soares, iha Postu Administrativu Atauro, Munisípiu Dili.

Akuzasaun Prokuradór

Prokuradór akuza katak antes ne'e arguidu Manecas da Conceição Soares serbisu nu'udar funzionáriu públiku iha Ministériu Estatal no okupa pozisaun hanesan Administradór Postu Atauro no arguidu Januario Domingos Cabecas Soares serbisu nu'udar funzionáriu públiku iha Ministériu Saude hanesan Xefi Sentru Saude Postu Atauro.

Arguidu Manecas no arguidu Januariu, halo konvokatóriu ho xefe suku lima hamutuk ho

komunidade sira ne'ebé afeita husi konstrusaun kampo aviasaun provizóriu iha postu Atauro, no liuhusi enkontru hirak ne'e, to'os nain sira maioria konkorda atu hasai sira nia ai-han husi sira nia to'os, maibé to'os nain sira husu atu imdemniza sira nia ai-fuan no ai-horis, mak hanesan hudi, nu'u, ha'as, sabraka, goiavas, rumaun, aiata, aidila, kulu, derok, ai-teka no ai-kameli, ne'ebé sira kuda ona iha ida idak nia kintal.

Nune'e iha 04 Janeiru 2014, Ministériu Saude, liuhusi Serbisu Distritál Saude Dili (SDS) entrega osan subsídui ho montante US\$5,700,00 ba arguidu Manecas nu'udar Administradór Postu Atauro no arguidu Januariu nudar Xefe Sentru Saude Postu Atauro, hodi fahe osan refere ba uma kain sira ne'ebé afetadu husi konstrusaun kampo aviasaun temporáriu ho uma kain hamutuk 44.

Tuir mai iha 06 Janeiru 2014, arguidu Manecas no arguidu Januariu, hamutuk ho Eis Xefe Suku Beloi no Xefi Suku Villa Maumeta realiza enkontru ho família uma kain hamutuk 44 hodi diskute kona-ba mekanismu distribuisaun osan nomós foos toneladas 3 ne'ebé atu distribui ba família uma kain hirak ne'e.

Bazeia ba rezultadu enkontru refere, konsege kria mekanismu distribuisaun osan no foos subsídui ne'e bazeia ba to'os nia medidas no volume ai-han no ai-horis ne'ebé afeita, nune'e arguidu sira deside kada uma kain ida sei hetan osan US\$120.00 ba família hamutuk 41, osan US\$ 200.00 ba família uma kain hamutuk 3, uma kain 1 sei hetan US\$300.00, no kada uma kain ida sei hetan foos saka 2.

Husi lista pagamentu ba família uma kain 44 refere iha autus, identifika katak iha família uma kain 3 mak la simu osan subsídui refere mak hanesan Sr. Plasidu Lisboa la simu osan ho montante US\$300.00, Sr. Virgilio Hornai la simu osan ho montante US\$200.00 no Sra. Alcinha Batista la simu osan ho montante US\$120.00 nune'e totál osan subsidiu ne'ebé uma kain 3 la simu ho montante global US\$620.00 no foos hamutuk sakas 6.

Alende ne'e iha mós família balu mak Sr. Diogo soares Alves, la simu fos no la simu mós osan ho montante US\$120.00, Sr. Fernando da Conceição simu deit fos maibé la simu osan US\$ 120.00, Sr. Norberto Soares la simu osan US\$120.00 no Sra. Paulina Araújo Tilman simu deit US\$20.00 no falta US\$100.00, nune'e totál osan husi uma kain 3 ne'ebé arguidu sira la selu hamutuk US\$460.00, nomós família uma kain 2 mak hanesan Sr. Cleopas Tome no Sr. João Batista ne'ebé sira nia ai-han no ai-fuan hetan estragus maibé naran laiha lista. Nune'e hamutuk uma kain 6 ne'ebé la hetan ka lakohi simu pagamentu subsidiu husi Ministériu Saude refere, ho razaun tanba kuantidade osan subsídui ne'ebé sira atu simu ne'e kiik liu kompara ho valor sira nia ai-han no ai-horis ne'ebé hetan estragus. Iha autus no osan subsídui husi uma kain 6 ne'ebé la hetan pagamentu hamutuk US\$1,080.00. Osan ho montante US\$1,080.00 ne'ebé arguidu Manecas no arguidu Januario la halo pagamentu ba uma kain 6 refere konsta

iha akuzasaun, arguidu sira la devolve fila fali ba kofre estadu maibé arguidu sira rai fali osan ne'e iha sira nia uma durante tinan 5 nia laran, hodi apropria tiha osan sira ne'e uza ba sira nia interesse partikular, no arguidu sira foin entrega fali osan ho montante US\$620.00 ba Ministériu Públiku iha 23 Dezembru 2019, ne'ebé depozita ona ba iha konta Ministériu Públiku nian, no falta osan ho montante US\$460.00 mak arguidu sira seidauk devolve ba Estadu.

Iha parte seluk iha 02 Maiu 2014, arguidu Manecas da conceicao soares nu'udar Administradór Postu Atauro, liuhusi enkontru ho to'os nain sira ne'ebé afeita husi projeitu loke estrada foun iha area suku Beloi ba kampo aviasaun Atauro, deklara katak sei laiha imdemnizasaun ba ai-fuan no ba ai-horis no arguidu uza nia poder hodi autoriza ekipamentus pezadu husi Obras Publika hodi suru no ke'e sai ai-horis no ai-fuan sira komunidade nian la ho imdemnizasaun. Nune'e iha uma kain 2 mak hanesan Paulo de Araújo Saldanha no Antonio Saldanha mak la konkorda ho desizaun husi arguidu tanba liuhusi arguidu ninia desizaun prejudika uma kain 2 ne'e sira nia hudi hun hamutuk 244 mak hetan estragus, no ate agora laiha imdenizasaun. Arguidu sira hatene katak osan subsidiu ne'ebé Ministeriu Saude entrega ba sira nain rua ne'e ho finalidade atu rekompensa ai-han no ai-horis ba kada uma kain hamutuk 44, ne'ebé mak hetan estragus tanba impaktu husi projetu konstrusaun provizoriu kampo aviasaun Atauro. Arguidu sira mós hatene katak osan subsidiu ne'e laos pertense ba sira nian, nune'e tuir Lei arguidu sira iha obrigasaun atu devolve osan ho montante refere fila ba kofre estadu durante oras 24 nia laran, maibé pelu kontrariu arguidu sira ho konsiénsia rasik deside apropria tiha osan ho montante US\$1,080.00 durante tinan 5 nia laran hodi hetan benefisu ilejitimu ba sira nia interesse partikular, hodi hamosu prejuizu ba Estadu RDTL, no arguidu sira hatene katak sira ninia hahalok ne'e kontra Lei, maibé arguidu sira atua nafatin hodi hetan ninia rezultadu, ne'ebé sira rasik mak tenke reprezenta.

Prokuradór akuza arguidu sira kontra artigu 295 nú 1 KP kona-ba krime pekulatu ho moldura penál tinan 3 too 10 no artigu 297 KP kona-ba krime abuza podér ho moldura penal tinan 1 too tinan 4 prizaun.

Produsaun ba prova sira

Iha prosesu julgamentu, arguidu Manecas deklara katak iha faktu balun loos no balun laloos, faktu ne'ebé laloos maka arguidu laos la halo pagamentu subsídu ba uma kain sira maibé tanba iha falhansu tékniku hanesan iha lista ida nian naran no ema seluk mak mai foti fali osan no fos. Arguidu mós deklara ba tribunál katak ai-horis ne'ebé mensiona iha akuzasaun só iha deit maka nuu no hudi maibé seluk ne'e laiha. Arguidu mós deklara ba tribunál katak bainhira atu halo konstrusaun ba estrada foun arguidu hamutuk ho autoridade lokal sira halo enkontru ho komunidade sira no hetan akordo husi komunidade sira atu fó rai refere ba halo estrada. Arguidu mós deklara katak uma kain nain tolu ne'ebé la simu subsidiu laos arguidu sira mak la fó ka fahe maibé sira

rasik mak lakohi simu subsidiu tanba sira dehan osan kiik.

Entretantu arguidu Januario deklara ba tribunál katak faktu balu loos no balu laloos, faktu laloos maka lezadu sira hanesan Diogo no Paulino simu duni osan maibé tanba sira reprezenata husi inan no banin nune'e mosu konfuzau ba sira, hanesan mós Norberto nia naran maibé Carlos hanesan nia aman maka simu fali subsídu. Arguidu mós deklara katak osan laos US\$20.00 deit, maibé osan ne'ebé entrega hamutuk US\$120.00 inklui fos saka ida no arguidu rasik mak halo pagamentu tuir lista ne'ebé nia simu husi Administradór Postu. Arguidu mós deklara ba tribunál katak depoisde halo pagamentu arguidu prepara kendas relatóriu hodi relata ba xefe Sentru Saude Munisípiu Dili, alende ne'e informa direita mós ba Diretora Postu Saude Atauro.

Testemuña Norberto Soares deklara bá tribunál katak nia halo duni to'os iha kampo aviasaun durante tinan rua. Antes nia halo to'os refere iha uluk ona Sra. Alcina Batista mak halo hafoin entrega fali bá nia. Iha momentu Estadu iha planu atu foti fali rai refere, nia la simu osan bá indemnizasaun maibé simu de'it fos saka 2. Testemuña mós deklara katak informasaun kona ba indemnizasaun nia la hatene. Antes testemuña sira simu foos, sira rona uluk informasaun husi sosializasaun ne'ebé mak halo husi Administradór Atauro. Iha sosializasaun ne'e, informa katak Governu sei fó indemnizasaun maibé nia montante sira la dehan sai.

Testemuña Fernando Morais deklara bá tribunál katak, nia halo to'os iha fatin refere durante tinan 5 ai-horis sira ne'ebé kuda iha to'os mak hanesan batar, fore no ai-farina. Testemuña mós deklara katak iha momentu ne'ebá simu duni osan indemnizasaun no fos, maibé nia montante haluha ona. Tuir observasaun bá kazu ne'e prokuradór informa bá tribunál katak, antes ne'e testemuña mai fó uluk ona nia deklarasaun no iha dekalarasaun ne'e katak nia simu duni osan indemnizasaun US\$184.00 no fos saka 1.

Testemuña Paulina Soares deklara katak nia halo to'os iha fatin refere durante tinan 4, nia la simu osan indemnizasaun maibé nia katus oan naran Sr, Celestino mak simu osan US\$20.00 no fos saku 2. Tuir informasaun husi MP katak Sr, Celestino simu osan US\$120.00 no fos saka rua. Entretantu testemuña Paulina kontinua konfirma faktu ne'ebé nia deklara ona bá tribunál.

Testemuña Virgilio Monteiro deklara ba tribunál katak nia aman ne'ebé mate bian ona uluk kendas halo toos hodi kuda ai-horis sira maka hanesan ai-farina, nuu, hudi, aiteka, ai-kameli depois ekipa husi Obras Públiku mak ba dudu hotu rai no ai-horis sira no la fó indemnizasaun. Testemuña mós dekalra katak nia lakohi simu osan ne'ebé sira fahe tanba osan ho montante kiik nomos fos ne'ebé mak distribui ho kondisaun fohuk hotu ona.

Testemuña Alcina Baptista deklara ba tribunál katak nia la simu osan no fos maibé nia hakarak halo kontratu ba sira nia ai-horis ne'ebé sira dudu hotu hanesan sira dudu kanu bee naksobu hotu nomós fiu eletrisidade.

Testemuña Leopas Tome deklara ba tribunál katak nia la simu osan no fos no nia ai-horis sira ne'ebé sira dudu hotu maka hanesan nuu, ai-farina no hudi, testemuña mós deklara katak depoisde halo enkontru sira la tun ba baze hodi hatene kona-ba toos nain hamutuk hira.

Testemuña João Baptista deklara ba tribunál katak nia halo toos no kuda nuu maibé la simu osan no foos.

Testemuña Antonio José Pinto Ferreira depoimenta katak osan ne'ebé atu halo indemnizasaun hamutuk US\$5,600.00 entrega ba postu administrativu hodi halo pagamentu ba komunidade sira ne'ebé afeitadu maibé testemuña laiha koñesimentu ba osan refere atu selu ba saida no selu hira-hira.

Testemuña José Magno deklara ba tribunál katak iha pedidu ba Ministériu Saude hodi fó indemnizasaun ba komunidade, sasin mós laiha koñesimentu ba osan gastus husi projeitu refere no osan refere halo transferénsia husi tezoreira Sr.Filipi.

Testemuña Francisco da Costa deklara ba tribunál katak testemuña halo duni konsultasaun ho komunidade no konkorda hodi halo kontrusaun ba kampu aviasaun. Testemuña mós deklara katak osan restu ne'ebé la konsegue uja Sr. Januario maka kaer.

Testemuña Alexandre Alves deklara ba tribunál katak nia halo duni toos iha fatin konstrusaun ba kampo aviasaun no testemuña simu duni osan ho montante US\$80.00 ho fos saka ida deit, testemuña mós deklara katak pagamentu ba osan ne'e nia simu husi Manecas no asina iha lista pagamentu.

Testemuña Agostu Sarmento depoimenta katak enkontru ho komunidade sira no konkorda hodi halo kampo aviasaun, sasin mós halo toos iha fatin refere, maibé konkorda ho projeitu refere, iha enkontru refere la koalia kona-ba indemnizasaun ba komunidade sira. Iha lista toos nain hamutuk 44, kada uma kain sira simu US\$120.00 no iha uma kain 2 maka simu US\$200.00 tanba iha toos ne'ebé boot.

Testemuña Alberto Soares deklara katak iha komunidade uma kain 12 maka halo toos iha kampo aviasaun ne'ebé rezistu uma kain 10 simu fos 25 kilo no saku 2 ho osan US\$120.00

Alegasaun Finál

Prokuradór haktuir katak, iha tinan 2014 kuandu Ministériu Saúde halo pagamentu ba

projetu ne'e, iha osan kuaze US\$700 mak la uza, tanba tuir informasaun katak husi komunidade afetadu 44 iha uma-ka'in tolu mak la simu osan no osan ne'e tau de'it iha Brankas Ministériu Saúde Ataúro. Katak Aktu ne'ebé imputa ba arguidu na'in-rua prienxe rekezitu krime nian maske iha faktus balun arguidu sira laiha koñesimentu. Nune'e prokuradór husu ba tribunál atu aplika pena prizaun tinan rua suspende tinan tolu no indeminizasaun US\$460 ba arguidu nain rua.

Enkuantu defeza husu ba tribunál atu absolve arguidu nain rua husi krime rua tanba la prienxe rekezitus ba krime rua ne'ebé imputa ba arguidu nain rua.

Desizaun

Depoisde avalia faktu hotu ne'ebé produs durante julgamentu, tribunál konsidera laiha elementu ba krime ne'ebé imputa ba arguidu nain rua, nune'e tribunál konklui prosesu ne'e no absolve arguidu nain rua husi krime ne'e.

15. Krime abuzu konfiansa agravada no falsifikasaun agravada

Nú. Prosesu	: 0134/18 PDDIL
Kompozisaun Tribunál	: Koletivu
Juis	: Dr. Álvaro Maria Freitas, Dr. José Gonsalvez no Dr. Argentino Nunes
Prokuradór	: Hipólito dos Santos
Defeza	: Dr. Marçal
Desizaun	: Absolve

Iha 25 Fevereiru 2022, Tribunál Distritál Díli prezide julgamentu leitura sentensa ba krime abuzu konfiansa agravada no falsifikasaun agravada ne'ebé envolve husi arguidu Filomeno Santos Gondinho hasoru lezadu Fredy, iha Fomentu I, Munisípiu Dili.

Akuzasaun prokuradór

Prokuradór akuza katak iha loron no fulan ne'ebé la apuradu maibé iha 2018, lezadu husu ajuda ba arguidu atu kondus lezadu nia taksi hodi tula penumpang, tanba lezadu seidauk iha sim kareta nian. Maibé bainhira lezadu ba tiha Indonézia arguidu faan tiha kareta refere ba Chineza ida ho montante US\$7,000,00 no halo falsifikasaun ba lezadu nia asinatura hodi "*balik nama*" no halo kontratu faan no sosa sein koñesimentu husi kareta na'in no osan refere arguidu uza ba nia interese partikular.

Prokuradór akuza arguidu kontra artigu 257 KP kona-ba krime abuzu konfiansa agravadu ho moldura penal tinan 2 too tinan 8 no artigu 304 KP kona-ba falsifikasi saun agravada ho moldura penal tinan 2 too tinan 6.

Produsaun ba prova sira

Iha julgamentu arguidu deklara katak akuzasaun ne'ebé imputa ba nia balun laloos no balun loos. Arguidu konduz duni lezadu nia kareta durante tinan 1 fulan 4 nia laran maibé lezadu la halo pagamentu ba arguidu. Lezadu ne'e sidadaun Indonézia, iha loron ida lezadu haruka arguidu tula nia ba perbatasan "Batugade" atu lezadu bele ba Indonézia, to'o iha ne'ebá lezadu hateten ba arguidu nune'e ita-bo'ot nia direitu ha'u la fó ona tanba agora ha'u ba Indonézia no la mai ona, tanba ne'e ha'u entrega de'it mak kareta ne'e ba ita-boot, lezadu entrega verbalmente no fó nia pasaporte fotokopy. Ho nune'e mak arguidu iha ona intensaun hodi halo "*balik nama*" no deklarasaun sosa no fan no lezadu nia asinatura ne'e Sr. Nono halo falsifikasi saun tanba señor ne'e mak halo deklarasaun refere no arguidu selu ba Nono ho montante US\$5,000,00 depois deklarasaun refere loos tiha mak arguidu fan kareta refere ba Chineza ida ho folin US\$4,000,00 depois mak Chineza ne'e fan fali ba nia maluk seluk ho montante US\$7,000,00 ne'e arguidu la hatene no ikus mai lezadu mai fali Timor hodi halo keixa no kareta refere arguidu entrega fali ba Advogado Dr. Marçal Marscarinhos. Iha julgamentu arguidu ejiji ninia direitu durante tinan 1 fulan 4 nian ho montante US\$2,400,00 tanba tuir kontratu arguidu lori lezadu nia kareta no kada fulan lezadu sei selu nia ho US\$150,00 maibé lezadu la halo ida-ne'e.

Iha julgamentu ne'e tribunál labele rona deklarasaun lezadu nian marka prezensa tanba lezadu iha Indonésia hela.

Alegasaun finál

Prokuradór konsidera arguidu provadu komete krime ne'ebé konsta ona iha akuzasaun, tanba halo abuzu konfiansa husi ninia patraun no halo mós falsifikasi saun ba lezadu nia asinatura hodi fan tiha lezadu nia kareta, maibé arguidu devolve ona osan no kareta

refere fó fila-fali ona ba lezadu, nune'e husu ba tribunál atu fó pena ne'ebé justu no adekuadu ba arguidu.

Enkuadu defeza haktuir katak arguidu konfesa faktu hotu ne'ebé mak iha no kolabora di'ak ho tribunál no primeiravés mai hatan tribunál, nune'e husu ba tribunál atu absolve arguidu husi prosesu refere.

Desizaun

Depoisde avalia faktu hotu, tribunál prova katak arguidu faan tiha kareta refere ba Chineza ida ho montante US\$7,000,00 no halo falsifikasiasaun ba lezadu nia asinatura hodi “*balik nama*” no halo kontratu faan no sosa sein koñesimentu husi kareta na'in no osan refere arguidu uza ba nia interesse partikular. Maibé arguidu deklara katak nia fan kareta refere ho motivu ida katak patraun entrega ona kareta refere ba nia tanba durante tinan 1 fulan 4 arguidu lori lezadu nia kareta maibé lezadu seidauk selu ninia salariu no agora dadaun kareta refere entrega fali on aba lezadu.

Bazeia ba faktu provadu hirak ne'e, tribunál konklui prosesu ne'e no absolve arguidu husi prosesu ne'e.

16. Krime ofensa ba integridade física simples ho natureza violénsia doméstika

Nú. Prosesu	: 0051/21.LILIQ
Kompozisaun Tribunál	: Singulár
Juis	: Dr. Evangelino Belo
Prokuradór.	: Dr. Hernanio Rangel
Defeza	: Dr. José da Silva
Desizaun	: Pena prizaun fulan 6 suspende ba tinan 1

Iha 28 Fevereiru 2022, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu ASM hasoru nia feen, iha Munisípiu Likisá.

Akuzasaun Prokuradór

Prokuradór akuza katak iha 23 Fevereiru 2021, iha oras tuku 09:00 dadeer, arguidu tebe dala ida iha lezada nia kanotak rezulta lezada monu ba rai, arguidu kontinua tuku dala ida iha lezada nia matan laran rezulta lezada sofre moras iha kanotak no matan laran. Antes agresaun ne'e, arguidu ho lezada diskute malu kona-ba arguidu haruka

lezada atu ba chas arguidu nia telefone, maibé lezada lakohi, nune'e mosu agresaun hirak ne'e.

Prokurador akuza arguidu kontra 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun, arguidu mós deklara katak arrepende nia hahalok, diak malu ona ho lezada no promete sei la komete tan krime hanesan hasoru lezada iha futuru.

Alende ne'e, lezada mós konfirma faktu hotu iha akuzasaun no deklara katak arguidu ninia agresaun ne'e rezulta lezada sofre moras no trauma, nune'e Lazada halai ba hela tiha iha lezada nia inan aman.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena multa.

Enkuantu defeza husu ba tribunál fó pena ne'ebé adekaudu ba arguidu ho konsiderasaun sira katak, arguidu konfesa, arrepende nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kanotak rezulta lezada monu ba rai, arguidu kontinua tuku dala ida iha lezada nia matan laran rezulta lezada sofre moras iha kanotak no matan laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl